

Ilussaqqarneq pillugu ataatsimoortumik aaqqissuusseqqinnissamut, tassungalu atatillugu pisortat aningaasalersuinnermut qularnaveeqqusiisarnissaanut, aammalu akitsuutinik apparsaagallarnissanik, nuna tamakkerlugu isigalugu periusissioinnissamut Naalakkersuisut peqquneqarnissaannik Inatsisartut aalajangiiffigisassaattut siunnersuut. Aaqqissuusseqqinnissamut pilersaarut Inatsisartunut saqqummiunneqassaaq aalajangiiffigisassanngorlugulu 2027-mi upernaakkut ataatsimiinnermi (UPA27).

(Inatsisartunut ilaasortaq Erik Jensen, Siumut)

Akissuteqaat

(Ineqarnermut, Attaveqaasersuutinut, Isorliunerusunut Upalungaarsimanermullu Naalakkersuisoq)

Siullermeerneqarnera

Ilussaqqarneq pillugu aaqqissuusseqqinnissaq pillugu siunnersuummut saqqummiunneqartumut Naalakkersuisut sinnerlugit qujassuteqassaanga.

Innuttaasut amerlanerusut nammineerlutik inissiamik peqarnissamut piviusumik periarfissaqalernissaat pillugu kissaateqarneq Naalakkersuisunit isumaqatigaarput. Tamanna ineqarneq pillugu aaqqissuusseqqinnermut atatillugu sulinermi ingerlasumi qitiusumik isumaqarpoq. Aaqqissuusseqqinnerup pingaarnertut anguniagaq tassaavoq, ineqarnermut tunngasunik oqimaaqatigiiffiusumik pilersitsinissaq innuttaasullu amerlanerusut namminneq inissiamik peqalernissaannut tapersiinnissaq, matuma siullermeerlutik pisisunut atugassarititaasut pitsanngorsarnissaat ilanngunneqarluni.

Taamaakkaluartoq inissianik niuerfimmi ineriartornermut appakaassinnaanerup attatiinnarnissaa pingaartuuvoq. Inissianik niuerfik niuernermit atugassarititaasut atorlugit ingerlanneqartoq qitiulluinnartuusoq Naalakkersuisunit isumaqarpugut, taamaattumillu pisortat suliaasaqarfimmut akuleruttarnerat tunaartaqartariaqarpoq killeqartariaqarlunilu, matuma niuerfik innuttaasut inissiamik pissarsisinnaanerannut naammaginartumik tapersiivigineqarsimanngimmat.

Naalakkersuisunit isumaqatigaarput, inissianik niuernermi ingerlassat piffissap ingerlanerani ikilisimasut, matuma tunineqartartut ikinnerulersimanerat sivisunerusumillu tuniniaasarnerit ilanngullugit. Taamaakkaluartoq inissianik niuernermi aaqqissuussaanerup oqimaaqatigiinnginneranik ersersitsineq illuinnaasiortoq ilisarisinnaanngilaat. Ineriartorneq taanna ataatsimut isigalugu aningaasaqarnikkut atugassarititaasunut ataqatigiisillugu isigineqartariaqarpoq, matuma erniat qaffasissusiat ilanngullugit. Erniat qaffasinnerusut ingerlassat ikilinerannut sunneeqataapput, kisianni tamatuma ilutigisaanik inissianik niueruteqarnerup aalaakkaasunngoriartornera takussutissaqarpoq.

Pisortat aningaasalersuinermit aqqissuussinermut qularnaveeqquisiarnissaat pillugu siunnersuut, sukumiinerusumik misissuiffigissallugu soqutiginaateqartoq Naalakkersuisunit isumaqarpugut. Aaqqissuussinermi taama ittoq misissueqqissaqqinnissamut tunngavissiisaaq, matumani aningaasaliinissamut tunngavimmik tamanna piunasaqaateqassanersoq ilanngunneqarluni. Tamatuma saniatigut aningaasariivit aqqissuussinermut taama ittumut ilaarusussanissaat tunngavissaasariaqarpoq, kiisalu pisortat taarsigassarsisitsisartullu akornanni arlerinaammik avitseqatigiissinnaanerit naleqquttumik ilusilerneqartariaqarluni. Taamaaqataanik akitsuutit appartinnissaat pillugu siunnersuummut tamanna atuuppoq. Nunatta karsiata isertittagaanut periuseq taama ittoq kinguneqaateqassaaq, taamaattumillu aningaasaqarnermut politikikkut ataatsimoorussamik pingaarnersiulluni nalilersorneqartariaqarluni. Aningaasarsiornermi politikki attanneqarsinnaasoq atorlugu suliniutaasinnaasut tamarmik pinissaat pingaaruteqarpoq aamma Attassisinnaanermit Ineriartortitsinissamullu Pilersaarut 2-mi anguniakkanut naapertuuttariaqarpoq.

Tamatuma ilutigisaanik suliniutit arlallit aallartinneqareernikummata Naalakkersuisunit erseqqissarparput, siunnersuummi anguniarneqartut assingannut tapersiisuusut. Ineqarneq pillugu aqqissuusseqqinneq aqutigalugu inissianut aningaasalersuinermit tunngasuni aamma attartortumiit piginnittumut aqqissuussinermi periarfissat pitsanngorsarneqarnerat aallartinneqarpoq, nammineq pigisamik inissianik pissarsisinnaanermik nukittorsaausaaq tamatumalu peqatigisaanik Namminersorlutik Oqartussat inissiaataannik ikilisitsisussat.

Ineqarnermut suliassaqarfik niuerfittut ataatsimoortutut ataasiinnartut isigineqarsinnaanngilaq, tassami inoqarfiit anginerusut minnerusullu annertuunik assigiinngissuteqarmata.

Taamaattumik suliniutissat nutaat sumiiffinnut eqimattanullu, inissianik imaluunniit aningaasalersuinermit periarfissatigut immikkut anigorniagassaqartunut, siunnerfeqartinneqartariaqaralarput. Peqatigisaanik suliniutissat ineqarnermi aqqissuusseqqinnermut ingerlasumut ataqatigiissillugu isigineqartariaqaralarpoq.

Tamakku saniatigut Namminersorlutik Oqartussat inissiaataannik ikilisitsinissamut pilersaarut sularineqarpoq. Tamakku tunngavigalugit, allanik suliniutinik atuutilersitsinissaaq sioqqullugu suliniutini aallartinneqarsimasuni misilittakkat katersorneqarnissaat pissusissamisussasooq isumaqartoqarpoq, matuma nunanit sanillersuuffiusinnaasunit misilittakkat pisariaqartut ilaatinnissaat ilanngullugit.

Tamanna tunngavigalugu Naalakkersuisunit allannguutissatut siunnersuuteqarpugut:

”Inissiamik pisinermi siullermeersumik pisisunut atugassarititaasunik misissueqqissaarnermit ingerlatseqqullugit Naalakkersuisut peqquneqarnissaat pillugu Inatsisartut aalajangiiffigisassaattut siunnersuut, matumani aqqissuussinernit pioreersunit kiisalu nunani avannarlerni soqutiginaateqartunit misilittakkat ilanngullugit. Tamatuma

saniatigut aningaasaqarnikkut tunaartaqarluni suliniutaasinnaasut nalilersuiffiginerat misissueqqissaarnermut ilaassaaq, aningaasaqarnermi politikkimut kinguneqaataasinnaasut mianeralugit. Naalakkersuisut tamanna tunuliaqutaralugu suliniutissatut siunnersuutinik saqqummiussissapput inissianik pisinermi siullermeersumik pisisunut. Misissueqqissaarneq suliniutissatullu siunnersuutit UPA2027-mi suliarineqartussangorlugu Inatsisartunut saqqummiunneqassaaq.”

Taamatut oqaaseqarlunga aalajangiiffigisassatut siunnersuut Inatsisartunitk kajumittumik suliassangorlugu tunniuppara.